



## Múte B. Egedes nytårstale

**Taler**

Múte Bourop Egede  
Formand for Naalakkersuisut

**Dato**

1. januar 2024

**Sted**

Hans Egedes Hus, Nuuk

**Omstændigheder**

Talen blev TV-transmitteret direkte på KNR (Kalaallit Nunaata Radioa).

Asasakka nunaqqatit - Ukiortaami pilluangaaritsi.

Ukiumi qaangiuttumi pisorpassuaqarpoq. Inuttut nammineq aqqusaakkagut nuanneqisut, pilluarnaqisut aammali ilaatigut alianaqisut aqqusaarsimallutigit.

Asasagut toqukkut qimagussimasut eqqaamaqaagut uummatitsinnili pigiuassavagut – annaasaqarsimasut qamannga pisumik misiginneqatigingarpakka.

Aqqusaakkalli qanorluunniit ikkaluarpata inuuneq ingerlaqqittarpoq.

Uanga ukioq 2023-mi ataatanngoqqinnera uannut puigunaatsuni qitiuvoq. Meerannguummi tamatsinnut pilluaataaqaat.

Nunaqqatikka, ukiumut qaangiuttumut pisimasunullu tamanut qujanaq!

Ukioq 2023 qaangiuppoq. Pisussallu nutaat qilanaarluta pissangallutalu ornippagut.

Nunarput tamarmi maanna qaamanertusiartuinnavippoq, avannaanilu kaperlaap naligivaa, taamaattumik inuit qaamanermik seqinermillu sapaatit akunnerini aggersuni takullattaalissapput. Qaamaneq seqinerlu nukiupput, taakkualu uatsinnut kissalaamik neriunnermillu tunisisarput.

Naak ukiaq silarluttaraluaqisoq ukiukkullu issilluni perluttaraluaqisoq qaamanermik taarserneqartuaannarput.

Soorlu ullaap qaamarnga seqernullu kissareerluni nuigaangami nunannguarput qalipaasorsorlugu pilluarnarlunilu nukissaninnartuortoq.

Nunami peqqarniissinnaasumi najugaqarpugut. Taamaakkaluartorli nunamut tummisatsinnut nalimmassartarnerput pikkoriffigaarput.

-o-

Inuiattut ikittunnguulluta tulluusimaarutissanik peqarluarpugut.

Pikkorinnerpaanik taalliortoqarpugut eqqumiitsuliortoqarlutalu, tusaqqoornartuliullammasuarnik nipilersortartoqarpugut, atuaruminartunik allattartunik atuakkiortoqarpugut tiguaallaqqissorsuarnillu isiginnaartitsisartoqarluta.

Taakkuinnaangillalli. Aamma timersortartoqarpugut nunarsuarminut akiuussinnaasunik.

Tae Kwon Do-mi unammisartugut Europami pissartanngorniunnermi peqataanermikkut angusaqarluarput. Lars Lennert Abelsen tamatta tulluusimaarutigisatsinnik bronze-mik ujaminnappoq unammersuaarnermi pikkorinnerit pingajuattut inissilluni.

Aammattaaq arnat assammik arsarlutik nunanut allanut unammisartut ukioq 2023-mi ataatsimoortillualaavippaatigut.

Nunarput pillugu sassarput.

Nunarput pillugu takutitsilluarput.

Angusaq kusanaq!

Sukataarluni takutitsilluarneq, siuariarnerujussuuvoq tulluusimaarutissaq.

Angusaq imaaliallaannarluni angusaanngilaq, siunissamut isiginnissinnaassuseqarluni takorluugaqarlunilu tunngaviligaammat. Ukiummi qulit matuma siorna anngunnissamut peqataanissamullu pilersaarutit aallartipput.

Ukiut qulit ingerlaneranni anngunniukkiartarput ajorsartaraluarlutik–tunniutiinnanngisaannarlutik.

Ukiunilu taakkunani sukataarsimanagerat takussutissaqarluarpoq.

Angusamut taamak kusanartigisumut unammisartuvut nunaqqatigiillu tamassi pilluangaaritsi.

Nunarsuarmi pissartanngorniuunnermut peqataanerput imminermini ajugaaneruvoq.

Meerarpassuit sunnerpasi. Meerarpassuit takorluugaqalersippasi. Meerarpassuit anguniagaqarusussusermik takutitsiffigavasi.

Assammik arsartartut kinguaariit tullii aallartilluareerput.

U 20-t nukappissat assammik arsartartut 2023-mi Grækenlandimi nunarsuarmi pissartanngornioqataapput.

Arnat inuusuttut assammik arsarlutik nunanut allanut unammisartut U-18-it anngupput ukioq mannaluk Kinamut nunarsuarmi pissartanngorniateqataassapput.

Malinnaaffiginissarsi qilanaarnaqaaq.

Eqqaamatigu inuiattullu aamma isumassarsiorfigalugu, assammik arsartartutta arnat siunissamut takorluugaqarlutillu anguniagaqarsimanagerat. Aqagussaq kisiat pinnagu siunissarli periarfissiisoq upperalugu angusaqarluarput. Siulivut aamma taamak inuusimapput – ikioqatigiinneq, siunissaq kinguaariillu ingerlaqqittuarnissaat tunngavigiuarsimagamikku.

Qujassutissaqarnerpaaffigullu eqqaamajuartigit.

Tassami sinerissami illoqarfinni nunaqarfinnilu tamani, peqatigiiffinni akissarsinissartik pinngikkaluarlugu kajumissutsiminnik sungiusaasuullutillu peqatigiiffilerinermik ingerlatsisut. Ilissiuvusi nunatsinni maligassiusut. Taamaattumik uummammik pisumik timersoqatigiiffilerisut, erinarsoqatigiinni peqatigiiffinnilu allani ingerlatsisut tamassinnut suliassinnut nalitungaartumut qujanarujussuaq.

-o-

Nunatsinni ataatsimoorutigisinnaasagut amerlaqaat.

Ukiumi qaangiuttumi tallimangornerit tamaasa nunatsinni nuannersumik angerlarsimaffippassuarni ataatsimoortitsillaqqissoq tassaavoq Kimmernaq Kjeldsen. KNR-mi aallakaatitassiami “Kinamita-mi” aqutsisoq ilaatigut inunnik saqqummivallaanngitsunik inuiaqatigiinnili maligassiullutillu iliuuseqaqataasunik ilisarititsisarpoq. Aallakaatitassiaq nuannerluinnarpoq ilaatigullu inoqatigut nipaatsumik inooqataasut, immikkullu piginnaanillit piumassuseqartullu saqqummiuttarpai.

Inoqatitta akornanni piginnaanilinnik ulikkaarpoq.

Inoqatitta akornanni immikkuullarissunik ulikkaarpugut.

Tamatta maani nunami pisariaqartinneqarpugut.

-o-

Unammilligassagut suliassagullu amerlaqaat. Tamattalu atorfissaqartinneqarpugut suliassanut taakkununnga. Illit uangalu – inuttut ataasiakkaarluta nunatsinnut kinguaatsinnullu pitsaasumik tunniussaqaarnissarput pisariaqarpoq. Utaqqiinnaruttami unammilligassavut suliassavullu siuariarfiginavianngilavut.

Nunatsinni aammalumi nammineq inuttut unammilligassagut pitsaanerusumik qaangissagutsigit ilinniarneq periarfissatsialaavoq.

Ilinniarsimasuunermi qulakkiigassat pitsaasut amerlaqaat.

Assersuutigalugu pingaarnertullu imminut napatinneq.

Imminut napatileraanni inuiaqatigiinni ikiugassat ikilissapput.

Imminut napatinneq aammalumi ilinniagaqarsimasuuneq tulluusimarutissaapput.

Apeqqutaanngilaq ilinniakkap suussusaa. Imminulli pilersorneq tassa taannaavoq amerlanerit aqqutissaat.

Ilinniagaqarnermi aamma tassaavoq nunatsinni naligiinnginnerup akiornissaanut aqqutissat pingaarnertit ilaat.

Nunatsinni ilinniarsimasut amerliartuinnarnerat Naalakkersuisut nuannaarutigearput, sulili amerlanerunissaat soorunami kissaatigearput. Tamanna kiffaanngissuseqaarnerunissamut matuersaataammat.

Ilinniarsimassutsimik qaffassaaneq, nukittorsaanissarlu pisariaqarpoq.

Taamaattumik ilinniarusuttut qanortoq ilinniarfigerusutaminnut qinnuteqarlik.

Nunatta siuariartornissaanut tamatta suleqatigiittussaavugut.

Qaammatalunnguillu matuma siorna inuusuttut 39-t  
nunaqarfinningaanneersut Sisimiuni ataatsimeersuartinneqarput.

Inuusuttut ataatsimeersuaqataasut siunissami suliffeqarnissamut tunngatillugu  
isummersorput.

Inuusuttut oqariartuutaasa pingaarnert ilagaat, ilinniarnikkut periarfissatik  
annerusariaqartut. Siunissartik ilinniagaqasimasuullutik takorlooramikku.

Inuusuttut oqariartuutaat tusarnaartariaqarpagut aqqutissiuullugillu.

Taamaammat Naalackersuisut Siuariartornissamut Attassinissamullu  
Pilersaarut 2 saqqummiuteqqammisarput, nunatsinnilu  
aaqqissuusseqqittariaqarnitsinnik pisariaqartitsinitsinnik aamma oqariartortup  
qiteraa ilinniartitaanikkut ullumernit suli siuariarnerunissarput.

-o-

Tamatta pisariaqartinneqaratta. Sumiikkaluaruttaluunniit. Qanorluunniit  
inissisimagaluarutta periarfissaqartuartariaqarpugut.

Tamattami assigiimmik naleqarpugut.

Tamattami anguniagarput sunaasoq nalunngilarput.

Takoorloorpara:

Inuiaat nukittuut

Inuiaat akisussaaffimmik tiguserusuttut

Inuiaat ataqatigiittut

Inuiaat ineriartoqatigiittut

Inuiaat tarnikkut timikkullu nukittuut tapersersoqatigiittut

Tamattalu assigiimmik naleqarpugut.

-o-

Inuunitta ingerlanerani napparsimalersinnaasarpugut.

Inuunitta nalaani ikiortissarsiortariaqartarpugut.

Sanngiiffitsinni ikiortissarsiorneq ajortuunngilaq.

Peqqinnissaqarfimmi suliassarpassuaqarpoq. Tamannalu ataatsimoorullugu tamatta kivitseqatigiissutigisariaqaripput pisariaqarpoq.

Peqqinnissaqarfipput ajornartorsiorpoq pitsaanerungaartariaqarporlu.

2023-mi Naalakkersuisut Inatsisartunilu partiit sisamat peqqinnissaqarfik pillugu tunaartassanik isumaqatigiissuteqarput.

Tamannalumi aallaavigalugu Naalakkersuisunit Inatsisartunut ilaasortat tamarluinnangaajaasa peqatigalugit iliuuseqarpugut.

Peqqinnissaqarfimmut 2024-mi aningaasanut inatsisissamit aningaasaliissutissat missingersuusiorfiusuni katillugit 114 millionit koruuninik ilavagut.

Aningaasaliinerunitsigut qulakkiikkatta ilaat tassaapput; Pinartumik napparsimalertermi ajutoornermilu katsorsarneqarnissap qulakkeerneqarnera, kræftimut atatillugu suliarineqarnerup qulakkeerneqarnissaa,

sulisussarsiortarnerup sulisullu sulisoriinnarnissaasa ilinniartitaanerialu pitsanngorsaavigineqarnissaat.

Peqqinnissaqarfimmullu annertunerusumik naalakkersuinikkut aningaasaliineq kisimi naammanngitsoq nalunngilarput, sulimi suliassaqarpugut.

Suliniuterpassuit ulluinnarnilumi suliassat allat naammassineqassappata, sulisut passussisussat assaasa kissalaarneri atorfissaqartippagut.

Peqqinnissaqarfimmi sulisorpassuit tamaviaarlutik suliuartut qamangga pisumik qujaffigerusuppakka.

Neriuppunga suliatic imaannaangitsut pisariaqarluinnartullu suli siunissami naammassilluartaarumaaraat.

-o-

Nunatsinni sulisartorpassuaqarpugut. Ilaquttatik pilersorumallugit ullut tamaasa suliffimminnut tunniusimallutik suliartortartunik.

Qujanaq tunniusimalluarassi. Qujanaq kivitseqataagassi.

Tamatta assigiimmik naleqarpugut.

Sumiikkaluaruttaluunniit, qanorluunniit inissisimangaluarutta tamatta naligiillutalu pisariaqartinneqarpugut.

-o-



Nunatsinni suliassanik ulikkaarpugut.

Naalackersuinikkut 2024-mi suliagut suliassagullu pingaarutilippassuuppunaasiit.

Inatsisartut ukiaq ataatsimiinnerminni Inatsit tunngaviusussaq pillugu Isumalioqatigiissitat isumaliutissiissutaat Naalackersuisut nangissagipput aalajangerput. Suliaq tamanna Naalackersuisuni aallarereerparput, naalagaaffinngornissatsinnummi angusaqarnissatsinnut piumassuseqaqaagut.

Innuttaasut ilissi taakkuuvusi tunngaviusumik inatsisissatsinnut isummersortussat. Ilissimi tunngaviusumik inatsimmik piginnittuulertussaagassi.

Suliamut peqataanissarsi pingaartillugu qanoq pitsaanerpaamik iliorsinnaanerluta Naalackersuisunit maanna pilersarusiorpugut. Pilersaarutip ukiup massuma affaani siullermi naammassinissaa naatsorsuutigaarput.

Suliarli naammasseqqajannqilaq. Ukiuni tullerni innuttaasut qanimut peqatigalugit timitaliinissaq tullinnguutissaaq.

Taamaattumik alloriaqatigiitta. Sulinikkut aatsaat alloriarnerup tullia piviusunngussaaq.

Aqqutissarput manissuinnaanaviannqilaq taamaattorli unammilligassagut suleqatigiinnikkut paaseqatigiinnikkullu qaangerumaarpagut.

-0-

Nunatsinni naligiinnginneq annertuallaarpoq taamaattumillu

akileraartarnikkut aaqqissuusseqqinnissaq, partiit akornatsinni isumaqatigiinniutaavoq. Naatsorsuutigarpullu ukiortaap aallartissimatsiarnerani isumaqatigiissuteqartoqarsinnaasoq, pisariaqavippormi inuuniarnikkut innuttaasut oqilisaanneqarnissaat.

Suliassaq pingaarutilik pisariusorli. Pimoorulluinnarlugu suliaraarput.

Naammassinissaani uisorereriinnarmi pisinnaangitsoq oqaatigerusuppara. Taamaattorli qinigaaffiup uuma naannginnerani naammassisinnaasagut amerlanerpaat naammassiumallugit ulappuppugut.

Aaqqissuusseqqinnermi akileraartartut sulisartukkormiullumi atugarissaarnerulernissaat anguniakkani qitiuvoq. Naatsumik oqaatigalugu isertitakinnerit akunnattumillu isertitallit pingaarnertut malugisinnaasaannik aaqqissuusseqqinneq tunngaveqassasoq.

Naalakkersuisullu siunnerfigaarput nuna tamakkerlugu akileraarutip apparneqarnissaa kiisalu inummut ilanngaat ullutsinnut naapertuuttumik qaffanneratigut, imminut pilersorsinnaassutsip qaffasinnerulernissaaanguniagaraarput.

-o-

Ukioq nutaaq utoqqalinersialinnut siusinaarlutillu pisartagalinnut amerlasuunut pitsaasumik nassataqassaaq. Naalakkersuisuniimmi aamma Inatsisartuniit pilersuisussaataitanerup atorunnaarsinneqarnissaanik siunnersuutit Inatsisartut tapersersimalerpaat.

Aappaasup sulinermigut isertitarisai aallaavigalugit utoqqalinersiallit siusinaartumillu pisartagaqartut ilanngaassorneqartarnerat taamaalilluni qaangerneqassaaq, kiisami.

Tamanna aamma isumaqassaaq taamak inissisimasimasut atugarissaarnerulernissaat.

Aningaasaqarnermut siunnersuisooqatigiitaaq alloriarneq sulerusussutsip qaffasinnerulersinnaanerani kinguneqassasoq oqariartuutigaat, tamannalu ukiuni sulisussaaleqiffiusuni aamma iluaqutitaqassaaq.

Tamattami pisariaqartinneqarpugut.

Qinigaaffiup uuma aallartinneraniit utoqqartatsinnut siusinaartumillu pisartagalittatsinnut alloriarnerit pitsaasut arlariit ingerlassimalerpavut, suli suliassaqarpugut. Taamaattorli ataatsimoorluni angusimasat ajoriinnagassaangillat, pisartakkammi qaffanneratigut pilersueqatigiittussaanerullu peerneratigut, katillugit ukiumut 46 mio. kronerit sinnilaarlugit qaffaasimalerpugut.

Utoqqartatta siusinaarlutillu pisartagalittatta qaffaavigineqarsimasut kiisalu pilersueqatigiittussaataanerup peerneqarnerani iluaqutissinneqartussat pitsaasumik alloriarnerit malugiumaaraat qularutiginnilara.

Pissusissamisoorpoq uagummi pilluta nukippassuit atorlugit sulereerput.

-o-

Silaannarput kissatsikkiartorpoq. Oqartariaqarpugut sukkavallaamik tamanna pisoq.

Silap pissusaata allanngoriartornerata kinguneri tamatta malugaagut.

Oqarsinnaavugut sila unerisimannginnerulersoq, siumullu naatsorsoruminaassisoq.

Silap pissusaata taama sukkatigisumik allanngoriartorlunilu kissakkiartortoq

uagut inuit pilersitarigipput ilisimatusartut inerniliisarput. Tamanna tutsuiginartuuvoq tamaattumillu tamatsinnut iliuuseqarnissamut pisussaaffiliilluni.

Tamanna pillugu silaannaap kissakkaluttuinnarneranut akiueqataarusulluta Parisimi isumaqatigiisummut ilanngutissalluta ukiaq aalajangerpugut. Tamanna tulluusimaarnarlunilu pitsaasuvoq. Kinguaassagut suli kinguaariippassuit eqqarsaatiginerusariaqarpagut. Nunarsuarmi taakkua kingornussassaraat uagut maanna attartugariinnarparput.

Taamaaliortariaqarpugut. Uumasunimmi inuussuteqarnerput annertoqaaq, taamaattuaannassappallu iliuuseqarnissaq massakkut tassa piffissaavoq.

Inatsisartut ukiarmi 2023-mi ataatsimiinnerminni akuerivaat silap pissusaata allanngornera pissutigalugu, ajunaarnersuartut pisoqartillugu, inuutissarsiorsinnaangikkallarnermi kinguneqartumik ikiorsiisoqarsinnaasoq piniartunut, aalisartunut nunalerisortatsinnullu. Taakkummi pinngortitamik inuuniuteqartuugamik, silap pissusaata allanngoriartornera malugaat – assersuutigalugu avanersuarmi sikusarnerata allanngornera piniartunut sunniuteqarnerloqaluni. Ajornartuunnermi ikiorsiisoqarsinnaalernerana pisariaqarpoq allaqqunneqarsinnaananilu.

-o-

Nunatsinni inuussutissarsiutit pingaarnersaat tassaavoq aalisarneq.

Nunatta avammut tunisai tamarluinnangajammik aalisakkaneerlutillu qalerualinneerput. Taamaattumik aalisartut, aalisakkerisut, aalisakkanillu nassiussanik suliaqartartut tamaasa pinngitsoorsinnaangilagut qujassutissaqarfigalugillu.

Naalakkersuisuniit nuannaarutigisatta ilagaat sinerissap qanittuani qaleralinniarnermi, uneqattaanngitsumik aalisarnermik ingerlatsisoqarnera.

Nunattami aningaasaqarneranut ingerlaneranullu toqqavittut taaneqarsinnaapput. Tassa taama aalisarneq nunatsinnut aningaasarsiornerisinnullu pingaaruteqartigaaq.

Taamaattumik aalisarneq inatsisitigut aaqqissuuteqqissavarput. Inatsit ullutsinnut inuussutissarsiornermullu tulluarsarnerusariaqarpoq.

Sinerissallu qanittuani aalisartunut naleqqunnerusumik inatsimmi qulakkeerinniarnep ilagigaa.

Pisuussutit inuiaqatigiit pigisaat siammernerusariaqarput.

Aalisarneq pillugu Inatsisartut inatsisissaattut siunnersuut tusarniaassutigineqarpoq, innuttaasullu isummernissaminnut periarfissinneqarput.

Taamaalilluta aalisarnermut inatsisissaq ukiorpanni oqallisaasimaqisoq Naalakkersuisuniit piariissavarput. Inatsisissarluk Inatsisartunut upernaamut saqqummiutissavarput.

Inatsisissap aalisarnerup nunatsinnut pitsaanerpaamik aningaasarsiutaanerata attatiinnarnissaa qulakkeerinneqataaffigissava.

Soqutigisallit arlallit peqataassapput. Ataaserli qularnanngilaq. Kikkut tamarmik nuannaarutissaannik suliaqarniarneq ajornassaqimmat. Naalakkersuisuniilli aalisarnerup piujuartitsinermik ingerlanneqarnissaa soqutigisaraarput, tamannalu inatsisissami aamma pingaartissavarput. Minnerunngitsumillu inatsimmi allannguiniarnermi taamaassorinnet imaluunniit avissaartuunnissaq qitiutinnagu, kisiannili ataatsimoornissaq aaliangiiniarnermilu uivertitsiniaasunut tiguartinnginnissaq pisariaqarpoq. Nammineq kaasarfipput kisiat saalliutinnagu kisiannili inuiaqatigiit tamakkiisumik isigalugit inatsimmi sulisussaavugut.

Ataatsimuunngikkuttami inatsimmik nutarterisinnaassannginnatta!

Aningaasarsiorfippummi taanna innarlissappat inuiaqatigiittut atugarissaarnerput aamma kalluarneqangaatsiassaaq. Taamaattumik isumatusaaqqissaarluta inatsisiliornissarput avaqqunneqassanngilaq.

-0-

Aningaasarsiornitta siuarsarnissaanut aatsitassarsiorneq, malugalugu mingutsitsinnginnerusunik aatsitassarsiorneq, aqqutissatsialannut ilaavoq. Aatsitassarsiornerup pitsaanerpaamik sinaakkusersornissaa pillugu periusissiamik maanna suliaqarpugut. Periusissiap aatsitassarsiornerup mingutsitsinnginnissaa pinngortitamullu annerusumik innarliinnginnissaa qulakkiissavaa.

Aalisarneriinnangajammik avammut niuernerput siunissaq isigalugu pitsaanngilaq.

Siumut isigaluta pilersarusiortariaqarpugut.

Namminiilivinnermut aqqummiippugut, taamaattumik aningaasarsiorfiit allat aamma pilersittariaqarpagut.

Assersuutigalugit imeq nukillu minguitsoq atorluarnerusariaqarpagut.

Naalakkersuisut nunatta tamarmi assigiinnerusumik ineriartornissaa pingaarteqaarput sinaakkusersueqataaffigalugulu timitalersuiffigaarput qinigaaffimmi matumani.

Taamaattumik Qasigiannugit Aasiaallu akornanni erngup nukissiorfissaq aningaasalerneqarluni inatsisitigut inatsisartut sinaakkusersimasaat aamma aallartisarneqassaaq ukiuni aggersuni. Kiisalu Nuummi Tasiilamilu erngup nukissiorfiisa allilerneqarneri.

-o-

Nunarsuarmioqataagatta nunarsuarmimi susoqarnera aallaavigalugu akit nikerarlutillu akitsoriartorsinnaasarput.

Politikkikkut sinaakkusersuilluarsinnaavugut. Nunarsuarmili akit aqussinnaangilagut.

Taamaattumik qanortoq uagut inuttut aamma ileqqaalaartarnissamik iliuuseqartuarta.

Qanga siulersuagut ataqqinartut pikkorissimaqaat. Ullunimi ilungersunarsinnaasunut pilillutillu ileqqaarillutik pisarsimanagerat, pisortanullu isumalluuteqaratik inuusinnaasarsimanagerisa takutippaat qanoq kalaallit naleqqussallaqqissimatiginerat aammalu ikioqatigiillaqqittarsimatiginerat.

Ukiuni makkuni tamanna nukittorsaaffigisariaqaripput pissutsit ersersippaat. Imminut pilersorneq aammalu imminut napatissinnaanissarput aqqutigalugu inuiattut kiffaanngissuseqarnerulernissarput pilersitassaammat, allaniillu isumalluuteqarnerup minnerpaaffissaaniinnissaanik pisussaaffiliilluni.

Pisortat soorunami pisussaaffeqarput inuit ikiortariallit ikiussallugit. Taamaattorliuna inuiattut naleqqussartuarnissarput pisariaqartoq oqariartuutigigiga.

-o-

Nunarsuarmimi pissutsit allannguinernik malitseqartut akiorsinnaanngisagut arlaqarput. Assersuutigiinnarlugu russit Ukrainemut avaangunaqisumik,

maanna sivitsortumik, saassussinerat. Taamatuttaarlu Israelip Palestiinamilu peqqarniisaarniat Hamasikkut akornanni sorsuunneq qaammatialunni ingerlasimalersaq.

Sorsunneq qanortoq qaqagumut kalaallit aqputissatut isiginngisaannaritigu, sorsunnerimmi sussuteqanngitsunut minnerunngitsumillu meerannguanut eqquinerluttaqaaq. Oqaloqatigiinnikkut unammilligassat akerleriissutillu aaqqiivigisinnaanerat upperiuartigu.

Sorsunnerit qulaani taasama nioqputissat eqqussukkatta akiinut qanoq sunniuteqarnerat ilisimavarput. Tassami aningaasaq pisissutigisinnaasarput nalikinneruleriartorpoq, sulilu nalikinnerulersinnaanera aarlerinartumiippoq.

Taamaattumik aningaasaqarnerput sukannersumik aqussavarput. Inuuniarnikkullu oqilisaassinissaq akileraartarnikkut aaqqissuusseqqinnikkut ilaatigut aqputissiiutissavarput.

Taamatuttaarlu ullunut naatsorsoruminaassinnaasunut tulluussartariaqarpugut.

Aningaasat nalikilliarturnerat pissutigalugu Naalakkersuisut ikiorsiissuteqaqqammerput.

Ilaqutariit meerartallit isertitakinnerit ikiorneqarput.

Isorliunerusuni najugaqartut, silallu pissusaa pissutigalugu isertitaqarniarnermik ilungersuuteqartut ikiorneqarnissaat aqputissiiunneqarluni.

-o-

Avammut niuernitta annertusarnissaa anguniarlugu tigussaasumik ukioq



manna iliuuseqaqqinnikuuvugut.

Tassa Kinami Asiamut sinniisoqarfitta pisortatigoortumik ammaanersiornera qaammataluit matuma siornatigut pivoq.

Kinami sinniisoqarfeqalerneq pingaaruteqarpoq. Kinami Asialu tassaapput aalisakkanik qalerualinnillu avammut niuerfitta annerit ilaat.

Mittarfissuit atulerpata nunatta avataaniit takornariat amerlinissaat aamma qularnangilaq. Takornariaqarnerlu aamma aningaasarsiornitsinnut malunnaatilimmik siuariartuutaanissaa pisariaqarpoq. Ukiumi qaangiuttumi nunatsinnut angallattut malunnaatilimmik qaffariaqqipput, pissutsillu taamak ineriartornerat piareersimaffigisariaqarparput. Uagut inuiattut ineriartorneq taanna iluaqutiginerpaassagutsigu.

Mittarfissuit pioreersut aammalu illoqarfinni tamani kiisalu nunaqarfinni isorliunerusunilu aamma ineriartortoqarnissaa sanaartorfiunissaallu pimoorullugu timalersorlugu ingerlatsivugut. Nuna tamakkerlugu ineriartorneq qitiutipparput.

Nunanik allanik suleqateqarneq suli annertusartariaqarparput. Nunatsinnut iluaqutaanerulersillugu. Pineqartillutalu akuutinneqartarnissarput oqaasiinnaassanngilaq.

Uagut pineqartilluta avaqqulluta oqallinnerit aalajangiinerillu Naalakkersuisut akuerisinnaanngilluinnarpaat. Nunasiaajunnaareerpugut pineqartillutalu aalajangeeqataallutalu oqarsinnaasariaqarpugut, soorunami.

Tamanna ilaatigut ukiaq Norgemiinninni naqissuserpara.

Oqaluttuarisaanerput nuannersorpassuarnik peqarpoq. Avaanngunartulli aamma saqqummertalerput. Soorlu nivarsiaqqat arnallu akuersiteqqaarnagit naartunaveersaasorsorneqarsimanerat. Iliuserineqarsimasut taakku uanga akuerisinnaanngilluinnarpakka. Ilisimatusartut qulaajaanerat qanortoq arnat pineqartut peqataaffigilluarisiuk, eqqaamassuarsi uanga ilissi tapersorsorassi qanorlu pineqarsimannersi aliasuutigisarakku.

-o-

Neriuppunga ukiumi nutaami ilaqutariittut toqqissisimasumik meeqqatta inuuneqarnissaanut utoqqartattalu ilalersornerunissaannut nukigut atornerujumaarigut.

Meeqqat inuusuttullu isumassorneqartuarnissartik pisariaqarfiinilu killilerneqartarnissartik pisariaqartippaat. Killiliineq ajortuunngilaq asanninneruvorli.

Akunnitsinni aporfusinnaasut arlalitsigut qitiutittarpagut. Taanna mumisillugu ikioqatigiiffissagut ukioq maannamit qitiutilertigit. Angusassagut amerlanerungaassapput.

Tamattami immikkuullarissuseqarpugut tunniussassaqlutalu.

Inuunerup naleqassusia eqqaasitsissutigilara – taannaavoq ulluinnarni pingaarnerpaanut ilaasoq.

Uanga takorloorpara:

Inuiaqatigiit atugarissaarnerusut

Inuiaqatigiit imminut pilersortut

Tassungali killissagutta pilersaarusionluartariaqarpugut. Soorlu arnat inersimasut assammik arsartartut siunissamut piareersarneq qanoq iluaqutaatigisinnaanersoq takutikkaat.

Kalaallit Nunaanni innuttaasut.

Ataatsimoorluta angusassanik ulikkaarpugut.

Ataatsimoorluta meerartagut inuusuttortagullu ajunnginnerpaamik siunissaqartitsigit.

Ataatsimoorluta innuttaasut pitsaanerpaamik atugaqarnissaannik aqutissiuutsigit.

Ataatsimoorluta utoqqartagut ataqqillugit asanninnermik tunisigit.

Tamattami assigiimmik naleqarpugut tamattalu pisariaqartinneqarpugut.

Nunaqqatit. Nunarsuarmilu innuttaaqatigut.

Ukiortaami pilluangaaritsi.

**Kilde**

Manuskript modtaget fra taler

**Kildetype**

Oversættelse

**Tags**

Nytårstale, Udvalgte nytårstaler fra Landsstyreformanden

**URI**

<https://www.dansketaler.dk/tale/mute-b-egedes-nytarstale>